

香港山脈形勢論

吳師青著



吳師青先生著

論不離經

鄧肇堅敬題



樓宇寶鑑出版啓事

此書爲我國古天文學家、吳師青先生所著。宏博精純、匠心獨運、爲空前陽宅書未有之善本。全書分四章。一、新製圖式代羅經。二、納法。三、評論。四、簡選。趨吉避凶、歸納元運、其建塔、開門、收水、依法而行、福應有準。最適用於現代新式樓宇之用。先生以博愛之心、造无疆之福。卷末論婚、採呂才之說、及斗臨經吉凶方位鈴圖、俾擇婚者、知吉凶之理。業已附載天體曆、茲爲普及起見、不吝重載、欲使人人能依法配婚、則五世其昌、榮華富貴矣。現值出版伊始、本公司特爲介紹。此啓。

香港中天貿易公司啓

香港山脈形勢論

吳師青著

世之言地學者、必主黃石而祖筠松。師青於民國十三年、闡發青囊、天玉、寶照、之秘鑰、有地學鐵骨秘之著。忽忽四十餘年。以經商餘暇、註釋撼龍經、釐訂譌誤、切實分解、因文見義、朗若列眉。爲以前讀楊公書者、破其癥結、而豁其心胸。茲復本楊公心法真傳、而論次本港山脈形勢。

從來地學家、鮮有論述本港者。學者雖欲稽攷、其道無由。夫有一方之山水、則有一方之人物。是故觀

山水之廣大、出人必度量恢宏。山水逼窄、出人多襟懷狹隘。水聚而知其財貨豐盈、山飛而知其人民稀散。此乃山水性情形勢之使然、而不能踰越其範疇者也。余爲粵人、居港有年。徧歷山川、攷其形勢。時有所得、筆之於書、以備采風攬勝者之觀摩。敝帚自珍、或無譏焉。

撼龍經曰、須彌山是天地骨。論中國山脈者、以此爲鼻祖。蓋喜馬拉雅山、古稱崑崙、高出海面二九二〇〇呎、當日視爲世界第一高峯也。爲亞洲山脈之脊

、分中東西三大幹。經曰、惟有南龍入中國。南龍者、中幹也。西北一幹、直走崆峒、縱橫西域。東幹入朝鮮、與日本相接。今觀香港山脈、上溯南幹、其次梅嶺摩星、又其次則廣東白雲粵秀。經之所謂胎宗孕祖來奇特者此也。夫南幹爲天下最富庶之龍、廣東爲南幹最富庶之省、而香港爲南幹最富庶之商埠。明夫此、則山川之廻環曲折、纏纏如貫珠、無難指數焉。攷南幹自西東下、劈分西北江兩枝而入粵、撼龍經曰、分枝劈脈縱橫去、氣血勾連逢水住。脈分而水隨

、水住而脈聚也。故西江一支、從四川經雲南貴州、過湖南廣西。以肇慶爲近脈、幹氣直趨新會。諸水大匯於銀洲湖、不止二千里來源、去厓門爲水口。西江到頭作勢、起大小笄鷄蓋尖。（破軍廉貞）乃跌大峽、起綠湖屏、出圭峯山、（破軍變貪狼龍）結新會城。北江一支、從四川經湖北過江西至南雄。（梅嶺）以南韶連爲來脈、幹氣直達粵城、諸水大匯於白鵝潭、千里來源、去虎門爲水口、北江到頭作勢、起洞旗峯、（貪狼星）出白雲山、（祿存帶貪狼）結省城。就兩龍幹氣而論、西龍出西樵山、以獻秀而朝白雲。北龍不獻秀而朝圭峯。白雲居艮、西樵居坤、坤屬艮龍玄竅、關竅相通、賓主相對、北龍可統西龍、故省治屬北而西爲縣也。

撼龍經曰、大爲都邑帝王州、小爲郡縣君公侯。援此而論兩江之龍、可爲證助矣。吾粵在秦漢時、則有尉佗建號歸藩、創開王霸史蹟、粵台屹立、千有餘年。至五代劉龔建國、傳四主、歷六十八年、荔子灣頭、昌華故苑、猶留勝蹟。論人才則有唐代張曲江、爲

開元名相、風度冠古今。此皆北江主幹應運而生之最著者也。至西江一枝、雖爲賓龍。然幹氣所鍾、圭峯獨秀。得龍潭衛龍之水、收上流無限來源、下無點滴疏洩、雨不盈寸、旱不涸分。撼龍經曰、衛龍之水隨腹入、深入坎井不聞聲、此之謂也。故西龍有此、爲北龍所無、自成垣局重結。昔唐一行僧、望圭峯黃雲紫氣、歎曰、五百年必生聖者。果也眞儒代出、明有陳白沙、學遵孔孟、體衍程朱。清有南海朱九江、學貫天人、體兼漢宋。先後配享聖廟、俎豆馨香。餘如瓊州海剛峯、邱瓊山、亦儒宗之錚錚者。皆西幹之特產也。蓋山川靈氣鍾毓、其來有自、誠不虛也。

夫港龍遠溯南幹、近祖白雲、龍盡海疆、星辰應位、構成天市垣局。帝座天紀、位於半島。半島流水廻旋於三面、山陸毗連於一方。兼得貪巨武三吉之秀、湊合天然、鍾毓斯大。天下半島、往往應運而生聖賢。在昔孔子生於山東半島、耶穌生於阿拉伯半島、釋迦生於印度半島、皆爲發揚宗教之聖人。本港九龍半島、亦破祿兼貪巨武之秀。將必有適合世界大同之聖

人、應運而生者、可預言焉。市樓六星、渡海過峽、拔起星峰、爲精華薈萃之所。撼龍經曰、此是海門南脈絡、貨財文武交相錯。由此觀之、將必有握經濟重權、而造成工業王國者出焉。

白雲雄渾葱秀、爲粵省羣峯之冠。而行度鬱勃、勢漸東趨。陡起三角奇峯、儼若蓮花擎出、端嚴作祖、曜協廉貞。由蓮花而跨馬鞍、粉黛千叢、迤邐連綿、揭黃旗、帶銅鼓、過內峽、至寶安而龍勢一振。梧桐山拔地而起、爲入港龍脈之少祖、其龍爲破祿行度、

落平而化輔化文。經沙頭角、麻雀、八仙、大刀炭諸嶺、以祿文行度、南旋西折、突起大帽山、形成武曲、開大帳、分枝劈脈。西經上塘、盡於青山之南朗。

東經獅子馬鞍西貢、盡於石屋大浪。中則向南伸展、祿輔兼行。展開帳翅、經葵涌跌斷而起黃金山。渡海潛行、至昂船洲而露弼星。向西偏行、蜿蜒屈曲、形若金蛇。至青洲之東、昂藏鬱勃、拔地而起香島之扯旗山。北望傳變貪巨、東望傳變武曲、東北望則祿存帶祿、頂冠兜鍪、下分梳齒、輔弼侍從、乃祿存帶貪

巨武之貴徵、位坤向艮、而督署居焉。北山獻秀、衆水聚堂、明堂寬大、右砂嚴密、誠天然形勢之結晶位置也。撼龍經曰、如君識得祿存星、珍寶連城貴無價。又曰、明堂寬大容萬馬、富貴兒孫著錦衣、由此言之、香港雄峙東方、爲國際工商業之集中、握世界通商之樞紐、譽爲珠島、固其宜矣。又曰、此等星辰出大江、中有小貪並小巨、輔弼侍從左右生、隔岸山河遠相顧。不啻爲香島之山脉形勢言也。又曰海中洲渚亦有山、若論龍脈應難言。不知地脈連中國、遠出山形在海間。此又不啻爲九龍渡海來港之行龍言也。然以楊公之識力、猶有海中龍脈難言之歎。無怪今日之人、以香島山脉近北、則謂龍自鯉魚門而來。又以水來自珠江、則謂龍自大嶼山渡海。憑空臆斷、均無當也。蓋不識渡海潛行之脈、如何相連於中國者、烏足以言地理也哉。

撼龍經曰、五嶺分星自桂連、直至江陰大海邊。海門旺氣連閩粵、南水兩夾相交纏。夫香港爲南幹盡龍盡結之局、溯源珠江、百川來聚。垣列四門、星峯應

位。宜其富庶、駸駸然有駕乎西南各省者也。

撼龍經曰、大抵山形雖在山、地有精光屬土次。體魄在地光在天、識得精光眞精藝。此言善察地理者、必須先識垣局、方能盡其秘奧。攷天文志所載、天之三垣、北曰紫微、南曰太微、東北曰天市、少微西掖、此四垣所以鎮四方也。青囊經曰、天分星宿、地列山川、因形察氣、以立人紀、君臨四正、南面而治。則可知從古通都大邑、無不與星垣符合者也。觀我國河南之洛陽、陝西之關中、江左之金陵、歷代帝王建都之所、星宿光耀、山川錦繡、勝蹟猶存、令人景仰、此其顯然最著者也。卽如天津滬濱、爲我國南北通商大埠、熙來攘往、霞舉雲飛、繁盛若此、亦俱有天然山水垣局也。

從來觀天象者、每以星垣配合分野而言。觀象圖攷曰、赤道合地球熱帶間、以十二宮配之、中華應分奎壁、英國應分天市。清聖祖嘗以古人以天市爲北京分野、初疑其說。復謂細玩天球、中國去赤道二十四度至四十度、在穀雨立夏小滿三節氣上、天市垣去赤道

二十四度、而又認爲古人之說有據。西方學者、論地面與天體之分配。謂阿畢司巴臣氏、所著圖說、以黃道之經綫與地球經綫配合、可得管轄地面經度星座及度數。攝化尼羅氏測地均衡論、以爲地球經綫零度、與黃道帶之白羊零度配合、則又從中天所在地而定。又謂保羅哥司氏、建立地球各區、與天體座位分配、尙非標準、極感困難。對於現在還有不同意見、亟待多方研究、方可獲得天體分配地區管轄之方法。以上所舉、古自古、今自今、中外殊致。余論港九垣局、

但依楊公經旨、不談分星定野。在天成象、在地成形、均以山形水勢定之。庶乎可免附會穿鑿之譏。

臧龍經曰、垣有四門號天市。又曰、百源來聚天市垣。援此以本港山川形勢、配合天市垣。天市垣者、天帝之泉府也。位臨艮地、中有帝座。天紀九星、東北廻環。市樓六星居南。東有五星爲斗、四星爲斛。西有二星名帛度。垣牆兩扇、左右列宿各十四、不屬於四門矣。余僑港多年、閒常攬其星峯、按其方向、如大帽山之高入雲霄、允符帝座。八仙嶺與燈籠、白

雲、大刀岌、大瀝、麻雀、鷄公、笏鷄、大羅諸山、羣峯肅穆、左右班聯、真不啻天紀九卿。港方扯旗山、柏架山、與南丫島、青衣、鳳凰、大嶼、一帶、儼若崇墉傑構、正屬當門市樓。右有青山、九徑、聯成一串、實爲帛度。左有龍嶺獅峯、炮台、馬鞍、大藍、石屋、蛇頭、橘樹、大魚、各山、參錯其間、爲斗爲斛。天市之四門也。珠江匯西南衆流、浩浩湯湯、隨龍東注。天市之百源也。雖星座有廣狹、垣宿有參差、不能從板定刻劃。苟能融會貫通、自有天然湊合

之奧妙。若夫論垣局以辨機祥、參以經星主占、星學預言。天市垣、國市也、主權衡、聚民衆、爲商賈繁盛交易之所。天紀、秉鈞衡、肅紀綱、而齊秩序。市樓定市價、綰舶來、其陽爲金錢、其陰爲珠玉、萬方輻輳、而寶藏興焉。斗斛豐盈、民生自裕。帛度量平、商人不欺也。先哲有言、以人爲鑑、美惡畢呈。師青今將垣局揭出、則現在之趨勢、可資爲證。將來之發展、亦可得而言焉。港九星垣、推尊大帽。莊嚴璀璨、實冠羣倫。八仙諸峯、廻環帝座、揆之天紀、位

盡公卿、洵足屏藩我后。古制三公并列、大尉掌全國之兵、職權尤重。泉府精華、薈萃市樓、所謂陽金陰玉、輦來胥在於此。南丫、大嶼兩島、將來樓宇連雲、層層金碧、可爲萬國互市之商場。若論青山、九徑帛度、占經謂度量平、民不欺、從農民交易立言。然帛者、爲繒爲綢爲布、度者、出品多而不可以度計也。此方星應、不在農業而在紡織、前途工業振興、發展未可限量。環繞帝座之斗斛、占經謂斗與斛、爲歲熟糧豐、農民自裕。如獅子山、馬鞍山、九龍嶺、石

屋、大魚、二星主應、豈只爲礦產農林之區、其富庶必有長足進展。此斗斛之不量粟粒而量珠玉者在此也。以撼龍經之察行度、辨九星、瞻彼垣局、四美具矣。

若夫辨元運、論挨星、分順逆、定盛衰、此又不可不知。天玉經曰、干維乾艮巽坤壬、陽順星辰輪。支辰坎震離兌癸、陰卦逆行取、分定陰陽歸兩路、順逆推排去、知生知死亦知貧、留取教兒孫者。乃我國地學、推算山川氣運之秘訣。余有圖說、詳載所著地學

鐵骨秘中、可資參攷。總觀全局、綴以韻言。

港上星辰我欲探、游龍夭矯歷巉巖。紆迴起伏多傳變、撥盡沈沙渡海尋。昂船洲裏潛行跡、文曲委蛇右弼兼。知吾道眼高懸處、他日相逢一駐檐。五分破祿二文廉、武巨貪狼亦占三。武主富兮巨主貴、貪尤富貴不平凡。若從破祿廉文論、爲凶爲吉尙須參。天下山山多破祿、三吉相隨作貴談。旗山主曜勢尊嚴、座擁西南祿帶貪。萬方輻輳冠裳集、應運雄飛具爾瞻。

一九六四年一月出版

香港山脈形勢論

有 著 權
不 准 翻 印

著作者：吳 師 青

出版者：中天貿易公司

承印者：強 華 印 務

「地學鐵骨秘」再版啓事

此書爲我國古天文學家吳師青先生手著。自民國十三年初版，距今凡四十年。風傳中外，紙貴洛陽。潮州府志早已採入藝文類。敝公司茲爲發揚國粹，保存絕學起見。經與吳先生商訂，再行付印。鄧肇堅博士謂此書足與郭景純、葛雅川、青島、楊筠松、天玉奧語、都天諸書，可以傳世而行遠。加以跋語、具見此書之可寶。全書精裝一冊，定價港幣二十元，外埠函購、另加二元費郵。

香港中天貿易公司啓